

BOSNA I HERCEGOVINA
CENTRALNA IZBORNA KOMISIJA
SREDIŠNJE IZBORNO POVJERENSTVO



БОСНА И ХЕРЦЕГОВИНА
ЦЕНТРАЛНА ИЗБОРНА КОМИСИЈА

U P U T S T V O
o postupku žrijebanja političkih subjekata za utvrđivanje redoslijeda na glasačkom
listiću
(Prečišćeni tekst)

Sarajevo, 03.05.2024. godine

Na osnovu člana 2.9 stav (1) tačka 2, a u vezi člana 5.15 stav (2) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), Centralna izborna komisija Bosne i Hercegovine je na 20. sjednici, održanoj 03.05.2024. godine, utvrdila

U P U T S T V O
o postupku žrijebanja političkih subjekata za utvrđivanje redoslijeda na glasačkom listiću
(Prečišćeni tekst)

Član 1.
(Primjena)

Uputstvom o postupku žrijebanja političkih subjekata za utvrđivanje redoslijeda na glasačkom listiću (u daljnjem tekstu: Uputstvo), utvrđuje se postupak žrijebanja političkih subjekata, kako bi se odredio redoslijed na glasačkom listiću.

Član 2.
(Datum)

Centralna izborna komisija Bosne i Hercegovine (u daljnjem tekstu: Centralna izborna komisija BiH) najkasnije 73. dana, prije dana održavanja izbora, vrši žrijebanje ovjerenih političkih subjekata za određivanje redoslijeda na glasačkom listiću.

Član 3.
(Mjesto)

- (1) Žrijebanje iz člana 2. ovog Uputstva, se vrši u prostorijama Centralne izborne komisije BiH.
- (2) Izuzetno, ukoliko se žrijebanje ne može održati u prostorijama Centralne izborne komisije BiH, Centralna izborna komisija BiH svojom odlukom određuje drugo pogodno mjesto za žrijebanje ovjerenih političkih subjekata za određivanje redoslijeda na glasačkom listiću.
- (3) O mjestu, datumu i vremenu održavanja žrijebanja, Centralna izborna komisija BiH obavijestit će političke subjekte i javnost najkasnije 24. sata prije održavanja žrijebanja.

Član 4.
(Način žrijebanja)

- (1) Žrijebanje iz člana 1. ovog Uputstva, vrši se:
 - a) elektronski i/ili
 - b) ručno.
- (2) Svi politički subjekti ovjereni za učešće na izborima i koji su podnijeli ovjerene kandidatske liste, učestvuju u žrijebanju za utvrđivanje redoslijeda političkih subjekata na glasačkom listiću.

Član 4.a **(Elektronsko žrijebanje)**

- (1) Elektronski postupak žrijebanja političkih subjekata je postupak žrijebanja političkih subjekata putem međunarodnog internet servisa Random.org.
- (2) Elektronsko žrijebanje vrši se na način da se utvrdi Lista političkih subjekata (u daljem tekstu: Lista prijava), po redosljedju prijave političkih subjekata.
- (3) Lista prijava iz stava (2) ovog člana, se unosi u aplikaciju, nakon čega se zadanim algoritmom određuje redosljed političkih subjekata na glasačkom listiću.
- (4) Transparentnost procesa osigurava se mogućnošću provjere postupka žrijebanja putem internet stranice servisa Random.org.
- (5) O utvrđenom redosljedju na glasačkom listiću se donosi odluka koja se usvaja na sjednici Centralne izborne komisije BiH.
- (6) U slučaju tehničke nemogućnosti elektronskog žrijebanja vrši se ručno žrijebanje.

Član 4.b **(Ručno žrijebanje)**

Ručno žrijebanje se vrši na način da zaduženo lice od strane Centralne izborne komisije BiH, iz providne staklene posude izvlači pojedinačne kuglice sa nazivima političkih subjekata. Nakon svakog pojedinačnog izvlačenja čita se naglas redni broj, kod i naziv političkog subjekta koji se upisuje u tabelu počev od rednog broja 1 i nadalje do kraja izvlačenja svih kuglica iz providne staklene posude.

Član 5. **(Prikaz političkih subjekata)**

- (1) Radnje propisane u članu 4.a i 4.b ovog Uputstva, se hronološki prikazuju putem projektora na ekranu, u skladu sa redosljedom izvlačenja naziva političkih subjekata.
- (2) Centralna izborna komisija BiH, nakon provedene procedure iz stava (1) ovog člana, svojom odlukom određuje redosljed političkih subjekata na glasačkom listiću, koja se javno objavljuje na internet-stranici Centralne izborne komisije BiH www.izbori.ba.

Član 6. **(Zapisnik o postupku žrijebanja)**

- (1) O postupku žrijebanja vodi se Zapisnik.
- (2) Zapisnik se javno objavljuje na internet-stranici Centralne izborne komisije BiH www.izbori.ba i služi kao osnov za ulaganje prigovora na odluku Centralne izborne komisije BiH iz člana 5. stav (2) ovog Uputstva.

Član 7.
(Javnost postupka žrijebanja)

- (1) Postupak žrijebanja iz člana 1. ovog Uputstva, je javan i postupku mogu prisustvovati predstavnici političkih subjekata i medija.
- (2) Centralna izborna komisija BiH može osigurati da se postupak žrijebanja prenosi uživo putem javnih elektronskih medija i /ili live stream.

Član 8.
(Analogna primjena propisa)

Odredbe ovog Uputstva, utvrđene u članu 5. 6. i 7, gdje je to moguće, na adekvatan način se primjenjuju na proceduru provođenja javnog postupka dodjele mjesta u biračkim odborima propisanu članom čl. 24. Pravilnika o postupku imenovanja biračkih odbora za Lokalne izbore u Bosni i Hercegovini 2024. godine broj: 05-1-02-2-577-1/24 od 03.05.2024. godine.

Član 8a.
(Upotreba izraza u muškom i ženskom rodu)

Izrazi koji su radi preglednosti, u ovom Uputstvu dati u jednom rodu, bez diskriminacije se odnose na muški i ženski rod.

Član 9.
(Propisi obuhvaćeni Uputstvom)

Ovim Uputstvom obuhvaćeno je Uputstvo o postupku žrijebanja političkih subjekata za utvrđivanje redoslijeda na glasačkom listiću broj: 05-1-02-2-625-1/22 od 04.05.2022. godine i Uputstvo o izmjenama i dopunama Uputstva o postupku žrijebanja političkih subjekata za utvrđivanje redoslijeda na glasačkom listiću broj: 05-1-02-2-588-1/24 od 03.05.2024. godine.

Član 10.
(Objava)

Ovo Uputstvo objavit će se u "Službenom glasniku BiH, u "Službenim novinama F BiH", "Službenom glasniku RS", "Službenom glasniku Brčko distrikta BiH" i web stranici Centralne izborne komisije BiH www.izbori.ba.

Broj: 05-1-02-2- 590-1/24
Sarajevo, 03.05.2024. godine

